


吳興備志

八



吳興備志卷之二十

烏程董斯張遐周彙編

振恤徵第十五

漢陽嘉二年春二月甲申詔以吳郡饑荒貸人種糧

後

漢書

吳赤烏十三年秋八月故鄣寧國諸山崩鴻水溢詔原

逋責給貸種食

吳志

晉咸安二年三吳大旱人多餓死詔所在振給

晉書

宋泰始二年曲赦吳興義興晉陵四郡

宋書

元嘉七年吳興晉陵義興大水遣使巡行振恤

十二年六月丹陽淮南吳興義興大水京邑乘船已酉

以徐豫南兗三州會稽宣城二郡米數百萬斛賜五郡
遭水民八月乙亥原遭水郡諸逋負

孝武孝建二年秋八月三吳民饑詔所在振貸

大明元年五月吳興大水人饑乙卯遣使開倉振恤

廢帝永光元年八月丙戌原除吳吳興義興郡大明八
年以前逋租

並上

齊建元二年六月癸未詔昔歲水旱曲赦丹陽二吳義
興四郡遭水尤劇之縣元年以前三調未充虛列已畢
官長局吏應供償補外詳所除宥

南齊書

建元六年九月辛丑詔二吳義興三郡遭水減今年田
租

永明五年八月乙亥詔今夏雨水吳興義興二郡田農多傷詳蠲租調

永明六年八月乙卯詔吳興義興二郡水潦被水之鄉賜瘡疾篤癰口二斛老疾二斛小口五斗

永明八年詔吳興水淹過度開所在倉振賜

永明九年都下大水吳興偏劇竟陵王子良開倉振救貧病不能立者於第北立廨收養給衣及藥

並上

唐貞元八年令揚楚廬壽滁潤蘇常湖等州百姓因水損田苗所在長吏具聞撫綏百姓因水不能自存者委宣撫使振給死者各加賜物官爲收斂薶瘞

見鎮江府

志

太和二年六月戊寅蘇湖二州水振米二十二萬石以
本州常平義倉斛斗給

舊唐書

宋太平興國六年四月丙戌罷湖州織羅放女工

通鑑

皇祐四年二月庚子蠲湖州民所貸官米

並上

嘉祐六年秋七月詔振恤浙水災

宋史

元祐四年蘇軾請預備災傷疏曰去歲杭州米價每斗
至八九十自今年正月以來日漸減落至五六月間浙
西數郡大雨不止太湖泛溢所在害稼六月初間米價
復長七月初斗及百錢足陌見今新米已出而常平官
米不敢住糴災傷之勢恐如去年何者去年之災如人
初病今歲之災如病再發病狀雖同氣力衰耗恐難支

持又緣春夏之交雨水調勻浙人喜於豐歲典賣舉債
出息以事田作車水築圩高下殆徧下本已重指日待
熟而淫雨風濤一舉害之民之窮困實倍去歲近者將
官劉季孫往蘇州□□臣密令季孫沿路體訪季孫還
爲臣言此數州不獨淫雨爲害又多風駕起潮浪隄
堰圩埠率皆破損湖州水入城中民家皆尺餘此去歲
所無有也而轉運判官張璠自常潤還所言略同云吳
江平望八尺間有舉田苗沒在深水底父子聚哭以船
械撈獲云半米猶堪炒喫青穠且以喂牛正使自今雨
止已無豐歲而況止不止又未可知則來歲之憂非復
今年之比矣何以言之去年杭州管常州米二十三萬

石今來已糶過十五萬石雖餘八萬石而糶賣未已又緣去年災傷放稅及和糶不行省倉闕數所有上件常平米八萬石只了兌撥充軍糧更無見在惟糶米錢近八萬貫而錢非救饑之物若來歲米益貴錢益輕雖積錢如山終無所用熙寧中兩浙市易出錢百萬緡民無貧富皆得取用而米不可得故綺羅曳帶金玉橫尸道上者不可勝計今來浙東西大抵糶過常平米見在數絕少熙寧之憂凜凜在人眼中矣臣材力短淺加之衰病而一路生齒憂責在臣受恩既深不敢別乞閒郡日夜思慮求來年救饑之術別無長策惟有秋冬之間不惜高價多糶常平米以備來年出糶今來浙西數州米

既不熟而轉運使又管上供年額斛斗一百五十餘萬石兩司爭糴米必大貴饑饉愈速和糴不行來年青黃不交之際常平有錢無米官吏拱手坐視人死而山海之間接連甌閩盜賊結集或生意外之患則雖誅殛臣等何補於敗以此具實聞奏伏望聖慈備錄臣奏行下戶部及本路轉運提刑兩路鈐轄司疾早相度來年合與不合準常平斛斗出糴救饑如合準備卽具逐州合用數目臣已約度杭州合用二十萬石仍具逐司擘劃合如何措置令米價不至大段翔踊收糴得足如逐司以謂不須備出糴救饑卽令各具保明來年委得不至饑殍流亡結罪聞奏緣今來已是立秋去和糴月日無

幾比及相度往復取旨深慮不及於事伏乞詳察速賜
指揮

蘇文忠集

軾又奏曰臣訪聞浙西饑疫大作蘇湖秀三州人死過
半雖積水稍退露出泥田然皆無土可作田塍有田無
人有人無糧有糧無種有種無牛殍死之餘人如鬼腊
臣竊度此三州之民朝廷加意惠養仍須官吏得人十
年之後庶可完復書曰制治於未亂保邦於未危浙西
災患若於一二年前上下疚心同力拯濟其勞實殘弊
必不至若今之甚也

並上

元祐六年兩浙大旱米價踊貴上供米百萬斛無所從
得官不罷糴則米價益貴糴錢不出則民間錢荒其病

尤甚憂之無以爲計余偶止殿廬中謂知樞密院韓師
朴曰浙中米貴欲於密院出軍闕額米中借百萬斛如
何師朴曰安敢借曰米陳不免賤賣今欲逐時先借而
令浙中以上供價四貫銀折還豈不兩便師朴曰如是
無不可遂奏行之是歲浙中依常歲得錢而米不出故
米雖貴不至甚

龍川略志

政和七年詔罷浙江花石綱

宋史

建中靖國元年自七月雨至於十月蘇湖秀三州水振
之

重和元年荆浙水振之

並上

紹興十四年閩浙大水振之

紹興十八年浙東西饑振之

紹興二十三年湖秀二州大水振之

紹興二十八年九月癸辛蠲平江紹興湖州被水民逋賦

紹興二十九年湖秀諸州饑振之

紹興三十年平江湖秀三州水無以輸秋苗有司抑令輸麥起居舍人試吏部侍郎洪遵上言麥價殊不在米下民困如是奈何指夏以爲秋衍一以爲二使擠溝壑乎願量取其半而被水害者悉免之

並上

紹興三十一年正月丁亥免湖州增丁所輸絹

集事淵

隆興元年蠲兩浙江東水旱租

乾道二年振兩浙江東饑

乾道三年兩浙水振之

乾道五年減兩浙明年夏稅和市之半

乾道十四年兩浙旱振之

淳熙六年浙江水八年江浙水並振之

並上

孝宗時湖州安吉夏租繭絲之徵既輸細絲又輸細綾

又輸細絹御史謝諤請蠲其一從之

楊萬里謝昌國神

道碑

慶元元年正月乙巳蠲嚴台湖三州貧民身丁折帛錢

一年九月己酉蠲嚴台湖三州被災民丁絹

宋史

嘉定十一年六月辛酉詔湖州振安吉縣被水之民

劉

後村玉牒初草

理宗寶慶元年二月蠲兩浙州軍屬縣官私僦錢有差
安吉州竹木之徵再蠲三月

並上

紹定六年詔兩浙轉運司臨安府嘉興府安吉州竹木
之徵再蠲三月

續文獻通攷

寶祐三年二月都省言臨安安吉嘉興屬縣水澇溺死
頗眾詔各郡守臣給錢糴瘞時馬光祖知榮王與芮府
有積粟三往見之王以他辭光祖乃臥於客次王不得
已見焉光祖厲聲曰天下誰不知儲君爲大王子今民
飢欲死不以此時收人心乎王以廩虛辭光祖探懷中

出片紙曰某莊某倉若干王語塞遂許以三十萬光祖遣吏分給活飢民甚眾

景定二年九月辛酉詔湖秀二郡水災令其亟勸分監司申嚴荒政

景定三年二月丁亥朔臨安安吉嘉興屬邑水民溺死者眾詔守臣給構瘞之

並上

咸淳六年閏十月己酉安吉州水免公田租四萬四千

八十石

宋通鑑

德祐元年十一月賜長興武康縣民錢并免今年田租

宋史

元至元二十五年夏四月癸酉尙書省臣言杭蘇湖秀

四州大水民鬻妻女易食請輟上供米二十萬石審其
貧者振之帝是其言

元史

大德六年六月湖嘉杭等路饑振糧二十五萬一千餘
石

續文獻通攷

大德七年以浙西饑免今年夏稅并各戶酒醋課

大德十一年七月以江浙屬郡飢詔行省發粟振之又
詔富家能以私粟貸者量授以官

並上

是年杭州大飢官設粥仙林寺中飢民殍死不爲衰
止何長者敬德以施捨振之爲事乃請好善而有財
智者五七人卽菩提寺作粥夜寅大甕中明旦飢民
以至先後列堂廡下或溢出門外道上相向坐虛其

前以行粥用二人舁一人執杓以注器中食畢以次
去日施粥米七八石至十石始六月至八月凡七十
日飢民無死者石塘胡先生長孺云往歲湖州作糜
食飢人糜脫釜猶沸湧器中人急得食食已輒仆死
百步閒長者夜作粥貯大甕中蓋懲湖州之事也

西湖游覽志

天祿二年江浙行省言常州湖州諸路飢民當振糧一
十四萬三千餘石從之

續文獻通攷

至順元年江浙大水民飢詔行省以入粟補官鈔三千
錠及勸出粟十萬石振之

並上

至順二年湖州安吉太湖溢漂民居二千八百九十戶

溺死一百五十七人命江浙行省振恤之

並上

武宗至大元年兩浙飢民飢者四十六萬戶死者甚眾
詔戶月給米六斗以沒入朱清張瑄財產振之

並上

中統二十四年正月蘇湖常秀四州俱飢十二月免浙

西魚課三千錠聽民自漁

續文獻通攷

至正元年以兩浙水災免歲辦餘鹽三萬引

並上

洪武二年十二月振應天蘇松杭湖諸郡貧民人給米

一石棉布一匹

松江新志

臨子溫青田人國初以明經擢監察御史洪武癸丑

命謁湖州水荒以實復命上曰先曰無爾獨曰有莫

不知所以者乎對曰天知地知臣知君獨不知帝忿